

全唐文紀事

全唐文紀事卷十四

原任翰林院編修

國史館纂修

實錄館提調

武英殿協修陳鴻墀纂

貢舉一

顯慶四年春二月乙亥上親策試舉人凡九百人惟郭

行訓張九齡五人居上第令待詔宏文館隨仗供奉

舊唐

書高宗紀

上元二年加試貢士老子策明經二條進士三條天后表曰伏以聖緒出自元元五千之文實惟聖教望請王公以下內外百官皆習老子道德經其明經咸令習讀

一准孝經論語所司臨時策試從之

文獻通考

鴻臚

謹案六經孔孟之說有國家者所當表章爲士者所當習業也老氏豈得並之武后假聖緒之說媚惑其君及其竊位則復以其所著臣範者同之六籍以易老子此豈足以垂世立範乎

遷考功員外郎始奏請明經加帖進士試雜文自思立

始也

唐書劉思立傳

調露二年四月劉思立除考功員外郎先時進士但試策而已思立以其庸淺奏請帖經及試雜文自後因以

爲常式

唐會要

劉仁範青衿冑子黃卷書生非應奉之五行異王充之一覽天下第一希聞胡廣之才曰下無雙罕見黃童之譽春秋一月徒棄光陰文史三冬虛淹歲月有司試策無鼂錯之中科主者銓量落公孫之下第理合逡巡斂分退坐受銓豈得俛仰自強肆情撾鼓伏稱問頭付晚策自難周銓退者卽恨獨遲簡得者不應偏早訴人之口皆有愛憎試官之情終無向背傲不可長驕不可盈若引窺覘之門恐開僥倖之路豸冠奏劾自合甘從馬

喙無冤何煩苦訴宜從明典勿信游辭

張鷟太學生劉仁範等省試落

第過鼓申訴准式卯時付問頭酉時收策試日晚付問頭不盡經業更請重試臺付法不伏

龍筋

鳳髓判

有唐纂厯雖漸革於前非陛下君臨思察才於共理樹
本崇化惟在旌賢今之舉人有乖事實鄉議決小人之
筆行修無長者之論策第喧競於州府祈恩不勝於拜
伏或明制纔出試遺搜敷則驅馳府寺之門出入王公
之第上啟陳詩惟希咳唾之澤摩頂至足冀荷提攜之
恩故俗號舉人皆稱覓舉覓爲自求之意未是人知之

辭察其行而度其材則人品於此見矣

薛登論選舉疏

文苑

英華

開元二十年正月制曰老子道德經宜令士庶家藏一本每年貢舉人量減尙書論策一兩條准數加老子策俾尊崇道本宏益化源今之此勅亦宜家置一本每須

三省以識朕懷

冊府元龜

開元二十四年考功員外郎李昂爲舉人詆訶帝以員外郎望輕遂移貢舉於禮部以侍郎主之禮部選士自此始侍郎親故移試考功謂之別頭

文獻通考

開元二十九年九月御興慶門數親試明道德經及莊
文列子舉人問策曰朕聽政之暇嘗讀道德經文列莊
子其書文約而意精詞高而旨遠可以體國可以保身
朕敦崇其教以左右人也子大夫能從事於此甚盛嘉
之古今異宜文質相變若在宥而不理外物而爲行遠
古之化非御今之道適時之術陳其所宜又禮樂刑政
所以經邦國聖智仁義所以序人倫使之廢絕未知其
旨道德經曰絕學無憂則乖進德修業之教列子力命
曰汝奚功於物又違懲惡勸善之文二旨孰非何優何

劣文子曰金積折廉壁襲無贏且申其義莊子曰括與
支交相養明徵其言使一理混同三教兼舉成不易之
則副虛佇之懷有姚子彥斯能元載等策入第各授之

以官

冊府
元龜

上御勤政樓試四科制舉人策外加詩賦各一首制舉

加詩賦自此始也

天寶十
二載

舊唐書元宗紀

天寶十三年元宗御勤政樓試博通墳典洞曉元經辭
藻宏麗軍謀出衆等舉人命有司供食既暮而罷取辭
藻宏麗外別試詩賦各一首制舉試詩賦自此始也時

全唐文紀事

卷十四

四

登科者三人綰爲之首超授右拾遺

唐書楊綰傳

冊府元龜唐天寶十載九月辛卯上御勤政樓試懷才
抱器舉人丙申勅曰朕祇膺大寶殷鑒遠圖慮草澤之
遺賢降弓旌於屢辟是以三紀於茲羣材輻湊或一言
可紀必適輪轅一善可經必加獎進庶六合之內靡然
同風四科之門咸能一貫何茲意之緬邈而增修之寂
寥今者舉人深乖宿望朕之所問必正經史卿等所答
咸皆少通朕以獨鑒未周必資僉議爰命朝賢三事精
加詳擇咸以爲關於聚學莫可登科其懷才抱器舉人

並放更習學其有不對策羅嘉茂既是白丁宜於劔南
効力全不答所問崔慎惑劉灣等勒爲本郡充學生之
數勿許東西其所舉官各量貶殿以示懲誠是通場皆
下第也然元宗不因是而廢此科且黜落之舉人猶稱
爲卿等旣無峻切之文亦不爲姑息之政斯得之矣

日知錄

且今之明經進士則古之孝廉秀才近日以來殊乖本
意進士以聲韻爲學多昧古今明經以帖誦爲功罕窮
旨趣其明經自今已後每經宜帖十取通五已上免舊

試一帖仍案問大義十條取通六已上免試經策十條
令答時務策三首取粗有文性者與及第其進士宜停
小經準明經例帖大經十帖取通四已上然後準例試
雜文及策考通與及第其明經中有明五經以上試無
不通者進士中兼有精通一史能試策十條得六已上
者委所司奏聽進止其應試進士等唱第訖具所試雜
文及策送中書門下詳覆其所問明經大義曰仍須對
同舉人考試

元宗條制考
試明經進士

我國家敦古質斷浮豔禮樂詩書是宏文德綺羅珠翠

深革弊風必使情見於詞不用言浮於行比來選人試判舉人對策剖析案牘敷陳奏議多不切事宜廣張華飾何大雅之不足而小能之是銜自今以後不得更然

元宗禁策判不切事宜詔

其博學科試明經兩史已上帖試稍通者多才科試經國商略大策三道并試雜文三道取其詞氣高者

元宗考試

博學多才道術醫藥舉人詔

唐世制舉科目很多徒異其名爾其實與諸科等也張九齡以道侔伊呂策高第以登科記及會要考之蓋先

天元年九月明皇卽位宣勞使所舉諸科九人經邦治
國材可經國才堪刺史賢良方正與此科各一人藻思
清華興化變俗科各二人其道侔伊呂策問殊平平但
云興化致理必俟得人求賢審官莫先任舉欲遠循漢
魏之規復存州郡之選慮牧守之明不能必鑒次及越
騎佞飛皆出畿內欲均井田於要服遵邱賦於革車并
安人重穀編戶農桑之事殊不及爲天下國家之要道
則其所以待伊呂者亦狹矣九齡於神龍二年中材堪
經邦科本傳不書計亦此類耳

容齋
續筆

國朝舉選用隋氏之制歲月既久其法益訛夫才智因習而就固然之理進士者時共貴之主司褒貶實在詩賦務求巧麗以此爲賢不惟無益於用實亦妨其正習不惟撓其淳和實又長其佻薄自非識度超然時或孤秀其餘溺於所習悉昧本源欲以啟導性靈獎成後進斯亦難矣

趙匡舉
選議

其試策自改問時務以來經業之人鮮能屬綴以此少能通者所司知其若此亦不於此取人故時人云明經問策禮試而已所爲變實爲虛無益於政今請令其精

習試策問經義及時務各五節並以通四以上爲第但
令直書事義解釋分明不用空寫疏文及務華飾其十

節總於一道之內問之餘科准此

趙匡舉
人條例

一進士習業請令習禮記尙書論語孝經并一史其雜
文請試兩首共五百字以上六百字以下試牋表議論
銘頌箴檄等有資於用者不試詩賦其理通其詞雅爲
上理通詞平爲次餘爲否其所試策於所習經史內問
經問聖人旨趣史問成敗得失并時務共十節貴觀理
識不用求隱僻詰名數爲無益之能言詞不至鄙陋卽

爲第

趙匡舉
人條例

一不習經史無以立身不習法理無以効職人出身以
後當宜習法其判問請皆問以時事疑獄合約律文斷
決其有既依律文又約經義文理宏雅超然出羣爲第
一等其斷以法理參以經史無所虧失粲然可觀爲第
二等判斷依法頗有文彩爲第三等頗約法式直書可
否言雖不文其理無失爲第四等此外不收但如曹判
及書題如此則可不得拘以聲勢文律翻失其真故合
於理者數句亦收乖於理者詞多亦捨其倩人暗判人

間謂之判羅此最無恥請榜示以懲之

趙匡選
八條例

有司或詰於議者曰吏曹所銓者四謂身言書判今外
州送判則身言闕失如何對曰夫身言者豈非洪範貌
言乎貌謂舉措可觀言謂詞說合理此皆才幹之士方
能及此今所試之判不求浮華但令直書是非以觀理
識於此既蔽則無貌言斷可知矣復曰舉人試策例皆
五通今併爲一有何理對曰夫事尚實則有功循虛則
益寡試策五通多書問目數立頭尾循虛多矣豈如一
策之內併問之乎

趙匡舉
選後論

臣伏見承前以來制舉遁迹邱園孝弟力田者或試時
務策一道或通一經粗明文義卽放出身亦有與官者
此國家恐其遺才至於明經進士服道日久請益無倦
經策旣廣文辭極難監司課試十已退其八九考功及
第十又不收其一二若長以爲限恐儒風漸墜小道將
興若以出身人多應須諸色都減豈在獨抑明經進士
也

楊場諫限約
明經進士疏

雋秀等科初皆考功主之開元二十四年李昂員外性
剛急不容物以舉人皆飾名求稱搖蕩主司談毀士類

實竊病之而將草焉集貢士與之約曰文之美惡悉知之矣考校取捨存乎至公如有請託於時求聲於人者當首落之旣而昂外舅常與進士李權鄰居相善乃舉權於昂昂怒集貢人召權庭數之權謝曰人或相知竊聞於左右非敢求也昂因曰觀衆君子之文信美矣然古人云瑜不掩瑕忠也其有詞或不典將與衆評之若何皆曰唯公之命旣出權謂衆曰向之言其意屬吾也吾誠不第決矣又何藉焉乃陰求昂瑕以待之異日會論果斥權章句之疵以辱之權拱而前曰夫禮尙往來

來而不往非禮也鄙文不臧既得聞命矣而執事者有
雅什嘗聞於道路愚將切磋可乎昂聞惶駭蹶起不知
所酌乃訴於執政謂權風狂不遜遂下權吏初昂強憤
不受囑請及有吏議求者莫不允從由是廷議以省郎
位輕不足以臨多士乃以禮部侍郎專之

唐詩
紀事

上元二年明經加試老子策二條進士三條永隆二年
考功員外郎劉思立建言明經多抄義條進士唯誦舊
策皆亡實才而有司以人數充第乃詔自今明經試帖
籀十得六以上進士試雜文二篇通文律者然後試策

王海玉

常袞爲禮部判雜文榜後云他日登庸心無不銳通宵絕筆恨卽有餘所放雜文過者常不過百人鮑祭酒防

爲禮部帖經落人亦甚時謂之常雜鮑帖

太平廣記

近煬帝始置進士之科當時猶試策而已至高宗朝劉思立爲考功員外郎又奏進士加雜文明經加帖經從此積弊浸而成俗幼能就學皆誦當代之詩長而博文不越諸家之集遞相黨與用致虛聲六經則未嘗開卷三史則皆同掛壁况復徵以孔孟之道責其君子之儒

者哉

楊綰條奏
貢舉疏

孝廉舉人請取精通一經每經問義二十條皆須旁通
諸義深識微言試策三道每日問一道問古今理體取
堪行用者經義及策全通爲上第望付吏部便與官義
通七策通二爲中第與出身下第者罷之又以寇難之
故衣冠多去故鄉所居必聞才行斯在望許所在州縣
且舉所諳知者秀才舉人準舊格惟試方畧策五條望
令精通五經每經準孝廉例問義二十條對策五條每
日試一道全通爲上第送中書門下超與處分十條通

七策通四爲中第送吏部與官下者罷之

楊綰貢舉條目

箴論表贊代詩賦仍各試策三道應口問大義明經人

明經之目義以爲先如有義策全通者五經舉人請准

廣德元年七月勅超與處分明經請減兩選

趙贊請以箴表等代

詩賦
奏

建中二年中書舍人權知禮部貢舉趙贊奏進士先時

試詩賦各一篇時務策五道明經策三道今請以箴論

表贊代詩賦仍試策二道

唐會要

崔元翰爲楊崖州所知欲拜補闕懇曰願得進士由此

獨步場中然亦不曉呈試故先求題目爲地崔敖知之
旭日都堂始開敖盛氣白侍郎曰若試白雲起封中賦
敖請退侍郎爲其所中愕然換其題是歲二崔俱捷

唐國

補史

中書省有柳樹建中末枯死興元元年車駕還京後其
樹再榮人謂之瑞柳渭試進士取瑞柳爲賦題上聞而

嘉之

唐書呂
渭傳

年二十一與弟郁同來舉進士其二年旣得之矣會有
司出賦題德宗不悅宰相喻使減人數故公與十餘人

全唐文紀事卷十四

皆黜

贈右散騎常侍
獨孤公墓誌銘

李文公集

鴻輝

謹案新書呂渭傳渭以瑞柳合貢士賦之帝聞

不以為善他書或云帝聞而惡之觀李翱獨孤墓誌

所云益知舊書誤也

開元以後四海晏清無賢不肖恥不以文章達其應詔

而舉者多則二千人少猶不減千人所收纔百一

沈既濟詞

科論序

唐承隋法不改其理此天所以待聖主正之何者進士

以詩賦取人不先理道明經以墨義考試不本儒意選

人以書判殿最不尊人物故吏道之理天下天下奔競
而無廉恥者以教之者末也

柳冕與權
侍郎書

文苑英華

按昌黎公贈張童子序言天下之以明二經舉其得升
於禮部者歲不下三千人謂之鄉貢及第其可進者屬
之吏部歲不及二百人謂之出身然觀登科記所載雖
唐之盛時每年禮部所放進士及諸科未有及五七十
人者與昌黎所言不合又開元十七年限天下明經進
士第每年不過百人又太和勅進士及第不得過四十
人明經不得過百一十人然記所載逐年所取人數如

此則元未嘗過百人固不必爲之限也又明經及第者姓名尤爲寥寥今日不得過百一十人則是每科嘗過此數矣豈登科記所載未備而難憑邪唐史摭言載華良入爲京兆解不第以書讓考官曰聖唐有天下垂二百年登進士科者三千餘人以此證之則每歲所放不及二十人也登科記不誤矣

文獻通考

貞元八年壬申春登進士第上邢君牙書云二十五而擢第於春官唐科名記云貞元八年陸贄主司試明水賦御溝新柳詩其人賈稜陳翥歐陽詹李博李觀馮宿

王涯張季友齊若劉遵古許季同侯繼穆贄韓愈李絳
溫商庾承宣員結胡諒崔羣邢冊裴光輔萬瑄是年一
榜多天下孤雋偉傑之士號龍虎榜

洪慶善韓子年譜

鴻臚謹案姚康科第錄李博實本年末名科名記錄
於第四非也又歐陽詹傳謂詹與韓愈李觀李絳崔
羣王涯馮宿庾承宣聯第皆天下選時稱龍虎榜蓋
是榜由此八人而重也

李子揚出貞元某年李文公題名唐之進士科目蓋自
韋肇始而兩京初未聞今考文公所書知府皆送有會

集書於慈恩石楹蓋當時等甲進士便與科名等故世尤貴重觀韋貫之集有啟獻韓貞公乞免知進士舉當時貞公欲以解頭目送文公謂頭須用合及等人恐不可令舉子作解頭取及第由是乃得以李翱爲第一張仲素次之蓋自十人解送而九人入等時以爲盛卽此

題名是也

李翱題名

廣川書跋

元和初予罷校書郎與元微之將應制舉退居於上都華陽觀閉戶累月揣摩當代之事構成策目七十五門及微之首登科予次焉凡所應對者百不用其一二其

餘自以精力所致不能棄捐次而集之分爲四卷命曰

策林云耳

策林序

白氏長慶集

朕以寡昧獲奉丕業虛已問政實始於茲考言求益敢
不祇若故命左右輔弼洎有位之臣會於中臺必究其
論緘密以獻省自朕躬果獲賢能副予饑渴才識兼茂
明於體用科人第三次等元稹韋惇第四等獨孤郁白
居易曹景伯韋慶復第四次等崔韶羅讓元修薛存慶
韋珩第五上等蕭俛李蟠沈傳師柴宿達於吏理可使
從政科第五上等陳蛄咸以待問之美觀光而來詢以

三道之要復於九變之選得失之間粲然可觀宜膺德

懋之典式叶言揚之舉

放制舉人勅

唐大詔令

長慶元年勅今年禮部侍郎錢徽下進士鄭朗等一十四人宜令中書舍人王起主客郎中知制誥白居易重試覆落十三人三月丁未詔曰國家設文學之科本求才實苟容僥倖則異至公訪聞近日浮薄之徒扇爲朋黨謂之關節干擾主司每歲策名無不先定永言敗俗深用興懷鄭朗等昨令重試意在精覈藝能不於異書之中固求深僻題目貴令所試成就以觀學藝淺深孤

竹管是祭天之樂出於周禮正經閱其呈試之文似不知本事詞律鄙淺蕪累至多亦令宣示錢微庶其深自懷媿誠宜盡棄以警將來但以四海無虞人心方泰用宏寬假式示殊恩特掩爾瑕庶明予志孔溫業趙存約竇洵直所試粗通與及第盧公亮等十人並落下錢微從別勅處分自今已後禮部舉人宜準開元二十五年勅及第訖所試雜文并策送中書門下詳覆侍郎錢微

貶江州刺史

穆宗覆試鄭朗等詔

唐會要

楊憑子渾之求進盡以家藏書畫獻文昌求致進士第

全唐文紀事

卷十四

夫

文昌將發面託錢徽繼以私書保薦翰林學士李紳亦託舉子周漢賓於徽及榜出渾之漢賓皆不中選李宗閔與元稹素相厚善初稹以直道譴逐久之及得還朝大改前志由逕以徽進達宗閔亦急於進取二人遂有嫌隙楊汝士與徽有舊是歲宗閔子壻蘇巢及汝士季弟殷士俱及第故文昌李紳大怒文昌赴鎮辭曰內殿面奏言徽所放進士鄭朗等十四人皆子弟藝薄不當在選中穆宗以其事訪於學士元稹李紳二人對與文昌同遂命中書舍人王起主客郎中知制誥白居易於

子亭重試內出題目孤竹管賦烏散餘花落詩而十人
不中選初議貶徽宗閱汝士令徽以文昌李紳私書進
皇上必開悟徽曰不然苟無愧心得喪一致修身慎行
安可以私書相證耶令子弟焚之人士稱徽長者既而
穆宗知其朋比之端乃下詔云云元稹之辭也制出朋
比之徒如撻於市咸睚眦於紳稹

唐書錢
徽傳

鴻臚

謹案舊書李宗閔傳時李吉甫子德裕爲翰林

學士錢徽榜出德裕與李紳元稹連衡言於上前而
不言文昌然考柳公綽傳徽掌貢之年鄭朗覆落公

綽首辟之即竟爲名相則微之鑒拔未爲不允矣

長慶初錢徽典貢舉宗閔託所親於徽而李德裕李紳
元稹在翰林有寵於帝共白徽納請丐取士不以實宗
閔坐貶劍州刺史由是嫌疑顯結樹黨相磨軋凡四十
年搢紳之禍不能解俄復爲中書舍人典貢舉所取多

知名士若唐冲薛庠袁都等世謂之玉筍

新唐書李
宗閔傳

唐穆宗長慶元年禮部侍郎錢徽知舉放進士鄭朗等
三十三人後以段文昌言其不公詔中書舍人王起知
制誥白居易重試駿放盧公亮等十人貶徽江州刺史

白公集有奏狀論此事大畧云伏料自欲重試進士以
來論奏者甚衆蓋以禮部試進士例許用書策兼得通
宵得通宵則思慮必周用書冊則文字不錯昨重試之
日書策不容一字木燭只許兩條迫切驚忙幸皆成就
若比禮部所試事校不同及駁放公亮等勅文以爲孤
竹管賦出於周禮正經閱其呈試之文多是不知本末
乃知唐試進士許挾書及見燭如此

容齋
隨筆

僕射王起典貢部選士三十人嚴與楊知至竇緘源重
鄭朴五人試文合格物議以子弟非之起覆奏武宗勅

曰楊嚴一人可及第餘四人落下

唐書楊嚴傳

朕自郊上元御端門發大號與天下更始思得賢雋標明四科令羣公卿士暨守土之臣詳延下位周於草澤成列待問副予虛求昧爽臨軒究其論正辭良術精義宏謀繹之旬時深見忠益言刈其楚列而第之賢良方正能直言極諫第三人龐嚴第三次等人呂術第四等人韋曙姚中立李躔第四次等人崔嘏崔龜從任畹第五等人韋正貫崔知白陳元錫博通墳典達於教化第四等人李思元詳明正術可以理人第四次等

人崔郢軍謀宏遠堪任將帥第三人吳思第五等人
李商卿咸以懿學茂識揚於明廷况當短晷之辰頗著
論思之美粲然高論深沃朕心永言藏器之規豈忘繫
駒之義寵之命秩允答嘉猷

長慶二年十二月
放制舉人詔

唐大詔

白樂天元微之同習制科中第之後白公寄微之詩曰
皆當少壯日同惜盛明時光景嗟虛擲雲霄竊暗闕攻
文朝矻矻講學夜孜孜策目穿如札毫鋒銳若錐注云
時與微之結集策畧之目其數至百十各有纖鋒細管

筆攜以就試相顧輒笑曰爲毫錐乃知士子待敵編綴
應用自唐以來則然毫錐筆之名起於此也

容齋
五筆

賢良方正能直言極諫科舉人第三等唐仲章端符舒
元褒第四等蕭做楊魯士揚儉來擇趙祝裴惲第四次
等韋繇李昌實嚴荆田邕崔璜第五上等李滄蕭夷中
馮球元晦詳閑吏理達於教化科第五上等章正貫軍
謀宏遠材任邊將科第三等裴儔第四次等侯雲章咸
讜言正詞兵符教本應問如響不窮如泉著之於篇爛
然盡在宜膺中鵠之選用叶縻爵之經在第三等人委

中書門下優與處分第四等第四次等第五上等中書

門下卽與處分

敬宗處分賢良方正等科舉人制

唐大詔令

太和七年禮部奏進士舉人先試帖經并畧問大義取經義精通者次試議論各一首文理高者便與及第其

所試詩賦並停

唐會要

賢良方正能直言極諫科舉人第三等裴素第三次等李劄第四等南卓李甘杜牧馬植鄭亞崔典第四次等崔讜王式羅紹京崔渠崔慎由苗愔韋昶崔搏第五次等崔渙韓賓詳閑吏理達於教化科舉人第四次等宋

昆軍謀宏遠堪任將帥科舉人第四次等鄭冠李栻等皆直躬遵道博古知微敷其遠猷志在宏益實能攻朕闕紹政經究天人交際之理極皇王通變之義指切精洽粲然可觀既校才於試可宜旌能於受祿其第三等第三次等人委中書門下優與處分第四次等第五上等人中書門下卽與處分

文宗委中書門下處分制科及第舉人詔

唐大

詔令

先是京兆府進士明經解送設殊次平等三級以甄別行實近年公道益衰止於奔競至解送之日威勢撓敗

如市道焉至是澳榜曰朝廷將裨教化廣設科場當開
元天寶之間始專重明經進士及貞元元和之際又益
以薦送相高當時務爲切磋不分黨甲絕僥倖請託之
路有推賢讓能之風等列標名僅同科第旣爲盛事固
可公行近日以來前規頓改互爭強弱多務闕馳定高
卑於下第之初決可否於差官之日曾非攷覈盡繫經
營輿學雄文例捨於貞方寒素增年矯白盡取以黨比
羣強中選者曾不足云而爭名者益熾其事澳叨司畿
甸合貢英髦非無藻鑒之心懼有愛憎之謗且李膺以

不察孝廉去任胡廣以輕舉茂才免官況其管窺實難
裁處况禮部格文本無等第府庭解送不合區分今年
合送省進士明經等並以納策試前後爲定不在更分
等第之限詞科之盛本以京兆府等第級建中二年崔
元翰崔敖崔備三人府元府副府第三人于邵知貢舉
放及第並依府列蓋推崇藝實不能易也自文學道喪
朋黨道興紛競旣多澳不勝憤遂此釐革蓋救一時之
弊人多惜之

東觀
奏記

全唐文紀事卷十四終

全唐文紀事卷十五

原任翰林院編修

國史館纂修

實錄館提調

武英殿協修陳鴻墀纂

貢舉二

準勅試別頭進士明經鄭齊之等十八人榜出之後語
辭紛競監察御史姚中立以聞詔錯審定乃昇李景王
淑等人以爲公以本官權知禮部貢舉開成元年春試
畢進呈及第人名文宗謂侍臣曰從前文格非佳昨出
進士題目是朕出之所試似勝去年鄭覃曰陛下改詩
賦格調以正頽俗然高錯亦能勵精選士仰副聖旨帝

又曰近日諸侯章奏語太浮華有乖典實宜罰掌書記以誠其流李石曰古人因事爲文今人以文害事懲弊抑末實在盛時乃以錯爲禮部侍郎凡掌貢部三年每歲登第者四十人三年榜出後勅曰進士每歲四十人其數過多則乖精選官途填委要室其源宜改每年限放三十人如不登其數亦聽然錯選擢雖多頗得實才

抑豪華擢孤進至今稱之

唐書高
錯傳

開成二年高侍郎錯主文恩賜詩題曰霓裳羽衣曲三年復前詩題爲賦題太學石經詩並辭入貢院日面試

言

開成中高鍇知舉內出霓裳羽衣曲賦太學創置石經
詩進士試詩賦自此始也

盧氏雜說

太平廣記

開成元年二年三年並高鍇知貢舉每年皆恩賜題目
及第並四十人

唐會要

臣鍇昨日奉宣進旨令將進士所試詩賦進來者伏以
陛下聰明文思天縱聖德今年詩賦題目出自宸衷體
格雅麗意思遐遠諸生捧讀相賀自古未有倍用研精
覃思磨礪緝諧其今年試詩賦比於去年又勝數等臣

日夜考較敢不推公進士李肱霓裳羽衣曲詩一首最爲迴出更無其比詞韻旣好人才俱美前場吟咏近三五十遍雖使何遜復生亦不能過兼是宗枝臣與狀頭第一人以獎其能次張棠詩一首亦絕好亞次李肱臣與第二人其次沈黃中琴瑟合奏賦又似文選中雪月賦體格臣與第三人其次王牧賦自立意緒言語不凡臣與第四人其次柳棠詩賦興思敏速日中便成臣與第五人凡此五卷詩賦擢其中科實所不愧其餘三十五人或獎舊文別錄人材非止一途四面搜擇臣並與

及第李肱舊文亦好人物絕奇每視其關他日必爲卿
相宗枝之俊實爲難得況屬籍之中讀書爲文者甚少
伏望聖明俯留宸覽李肱等五人詩賦若有不堪敢受
欺天之罪如或可採伺候聖心其李肱詩賦伏望陛下
聖慈特加獎飭宣示百僚以勸皇族飭修之道

高鏞先
進五人

詩賦
奏

文宗元年秋詔禮部高侍郎鏞復司貢籍曰夫宗子維
城本支百代封爵便宜無令廢絕常年宗正寺解送人
恐有浮薄以忝科名在卿精揀藝能勿妨賢路其所試

賦則准常規詩則依齊梁體格乃試琴瑟合奏賦霓裳
羽衣曲詩主司先進五人一詩最佳者則李肱也次則
王收日斜見賦則文選中雪月賦也況肱宗室德行素
明人才俱美敢不公心以辜聖教乃以榜元及第上披
文曰近屬如肱者其不忝乎有劉安之識可令著書執
馬孚之正可以爲傅秦嬴統天下子弟同匹夫根本之
不深固曹冏曷不非也

雲翁
友議

諸道應薦萬言童子等朝廷設科取士門目至多此外
更或延引則爲冗長起今後不得更有聞薦

文宗罷童
子科詔

今亞之雖不肖其著之文亦思有繼於言而得名光耀不滅於後由是旨春秋而法太史雖未得陳其筆於君臣廢興之際如有義烈端節之事輒書之善惡無所回雖日受摧辱然其志不死亦將俟能爲孔子之心者拔之去年始來京師與羣士皆求進而賦以八詠雕琢綺言與聲病亞之習未熟而又以文不合於禮部先黜去今年復來聞執事主選京兆長安中賢士皆賀亞之曰某執事斯謂明矣其取舍必以目辨而察亞之曰微亞之以八韻爲畏對曰不然夫良工爲廈而選材者不以

桷廢棟不責能此而否彼又曰無求備於一人此聖人
採取之至言也亞之文已貢矣執事其服孔子之心有
素如其取舍之際亦能留意乎

與京兆
試官書

沈下賢集

始生與兄之來舉進士得絀及綴字爲便口之句歷贊
其文於公卿之門由是一歲而名八年成都貢士生名

在貢首

送同年任
晚歸蜀序

沈下賢集

會昌三年十二月二十二日中書覆奏奉宣旨不欲令
及第進士呼有司爲座主兼題名局席等條疏進來者
伏以國家設文學之科求真正之士所宜行崇風俗義

本君親然後升於朝廷必爲國器豈可懷賞拔之私惠

忘教化之根源自謂門生遂爲朋比所以時風浸壞臣

節何施樹黨背公靡不由此

按韓文公送牛堪序吾未嘗聞有登第於有司而進

謝其門者則元和長慶之問士風猶不至此

日知錄

大中元年禮部侍郎魏扶奏臣今年所放進士三十三人其封彥卿崔琢鄭延休等三人實有詞藝爲時所稱皆以父兄見居重任不敢選取詔令翰林學士承旨戶部侍郎韋琮考覆勅放及第

舊唐書

大中末令狐綯罷相

其子瀉應進士舉在父未罷相前拔文解及第諫議大

夫崔瑄論高干撓主司侮弄文法請下御史臺推勘疏

留中不出

舊唐書令狐絢子高傳大中十三年絢罷相爲河中節度使爲其子高乞應進士舉許之

登第三十人有鄭羲者故戶部尚書澣之孫裴宏餘故相休之子魏當故相扶之子及澣皆大臣子弟諫議大

夫崔瑄論高權在一門勢傾天下及絢罷相作鎮之日便令高納卷貢闈豈可以父在樞衡獨撓文柄請下御

史臺按問奏疏不下冊府元龜載起居郎張雲疏後言絢方出鎮高便策名放榜宣麻相去二十三日

梁開平三年五月敕禮部所放進士薛鈞是左司侍郎

薛廷珪男方持省轄固有避嫌宜令所司落下

日知錄

大中九年正月十九日制曰朝議郎守尚書刑部郎中

柱國賜緋魚袋唐枝將仕郎守尚書職方員外郎裴

庭裕

先父早以科名薦由臺閣聲猷素履亦有可嘉昨者吏部以爾秉心精專請委考覈而臨事或乖於公當物議遂至於沸騰豈可尙列彌綸是宜並分符竹善綏凋瘵以補悔尤枝可虔州刺史散官勳封如故裴可申州刺史散官如故舍人杜德公之詞也

東觀
奏記

上雅尙文學聽政之暇常賦詩尤重科名大中十年鄭顥知舉後宣宗索科名記顥表曰自武德已後便有進士諸科出鶯谷而飛鳴聲華雖茂經鳳池而閱視史策不書所傳前代姓名皆是私家記錄虔承聖旨敢不討

論臣尋委當行祠部員外趙璘採訪諸家科目記撰成
十三卷自武德元年至朝謹專上進方俟無疆勅宜付
翰林自今放榜後並寫及第人姓名及所試詩賦題目
進入內仍仰所司逐年編次

東觀
奏記

乾符四年崔清爲京兆尹復置等第差萬年縣尉公乘
億爲試官試火中寒暑退賦殘月如新月詩李時

文公
孫

韋劓沈駕羅隱劉綦倪曙唐駢周繁

池人
善賦

吳廷隱賈涉

其年所試八韻涉
撫言
擅場而屈其等第

天復元年杜德祥榜放曹松王希霸劉象柯崇鄭希顏

等及第時上新平內難聞放新進士喜甚詔選中有孤
平屈人宜令以名聞特勅授官故德祥以松等塞詔各
受正制畧曰念爾登科之際當予反正之年宜降異恩
各膺寵命松舒州人也學賈司倉爲詩此外無他能時
號松啟事爲送羊腳狀希翥歙州人也辭藝優博松希
翥甲子皆七十餘象京兆人崇希顏聞中人皆以詩卷
及第亦皆年逾耳順矣時謂五老榜撫言
昨者崔凝所考定進士張貽憲等二十五人觀其所進
文書雖合程度必慮或容請託莫致精研朕是以召至

前軒觀其實藝爰於經史自擇篇題今則比南郭之筭
音果分一一慕西漢之辭彩無媿彬彬旣鑒妍媸須有
升黜其趙觀文程晏崔賞崔仁寶等四人才藻優贍義
理昭宣深窮體物之能曲盡緣情之妙所試詩賦辭藝
精通皆合本意其盧贍韋說封渭韋希震張濱黃滔盧
鼎王貞白沈崧陳曉李龜禎等十一人所試詩賦義理
精通用振儒風且躡異級其趙觀文等四人并盧贍等
十一人並與及第其張貽憲孫溥李光序李樞李途等
五人所試詩賦不副題目兼句稍次且令落下許後再

舉其崔礪蘇楷杜承昭鄭稼等四人詩賦最下不及格
式蕪類頗甚曾無學業敢竊科名洩我至公難從濫進
宜令所司落下不令再舉其崔凝爵秩已崇委寄殊重
司吾取士之柄且乖慎選之圖辜朕明恩自貽咎委
中書門下行勅處分奏來

昭宗覆試
進士勅

鴻堀 謹案崔凝貶合州刺史別有勅

禮部所放進士符蒙正等四人既嫌羣情實干浮議近
令覆試俾塞輿言及再覽符蒙正並成僚等程試詩賦
果有疵瑕若便去留慮乖激勸儻無升降卽昧甄明況

王徹體物可嘉屬辭甚妙桑維翰差無紕繆稍有功夫
其王徹升爲第一桑維翰第二符蒙正第三成僚第四

後唐莊宗更定符
蒙正等及第詔

吏部南曹關試今年及第進士李飛等七十九人內三
禮劉瑩李詵李守文明算宋延美等五人所試判語皆
同尋勘狀稱晚逼試偶拾得判草寫淨實不知判語不
合是一般者勅貢院擢科考語所業南曹試判激勸校
官劉瑩等既不攻文合直書其事豈得相傳藁草侮瀆
公場載考情由實爲忝冒及至定期覆試果聞自擅私

歸且令所司落下其所給春關仍各追納放罪許後放
舉自此南曹凡有人及第試判之時更效此者准例處

分

五代
會要

秋來赴舉備有常程夜後爲文會無舊制每取翰林學
士往例皆試五題共觀筆下摘詞不俟燭前構思

後唐
明宗

罷夜試
進士勅

以納言路廣進策人多別出試題蓋防假手韓滔獨墮
眾例輒出已懷敢以閒詞有違明勅而又情惟自衒事
匪合宜朝堂干祿之時尙猶倔強州縣親人之處可任

全唐文紀事

卷十五

九

作爲便合舉違勅之科加不恭之罪緣當誕月刑法務

寬宜殿一選

後唐明宗處分
獻策人韓滔勅

中書門下奏詳覆到禮部送今年及第進士李飛樊吉

夏侯珙吳泐王德柔李穀等六人望放及第其盧價等

七人及賓貢鄭朴望許令將來就試知貢舉張文寶試

士不得精當望罰一季俸從之

舊五代史
唐明宗紀

開運元年八月詔曰明經童子之科前代所設蓋期取

士良謂通規爰自近年暫從停廢損益之機未見牢籠

之義全虧將闡斯文宜依舊貫庶臻至理用廣旁求其

明經童子二科今復復置十一月工部尙書權知貢舉
竇貞固奏進士攷試雜文及與諸科舉人八策歷代已
來皆以三條燭盡爲限長興二年改令晝試伏以懸科
取士有國常規沿革之道雖殊公共之情難失若使就
試兩廊之下揮毫短景之中視晷刻而惟畏稽遲演詞
藻而難求妍麗未見觀光之美但同款答之由旣非師
古之規恐失取人之道今欲攷試之時準舊例以三條
燭爲限其進士並試色舉貢人等有懷藏書冊入院者
舊例扶出不令就試近年以來雖見懷藏多是容縱今

欲振舉弛紊明辨臧否冀在必行庶爲定式

舊五代史

庚子詔曰比者以近年貢舉頗事因循頻詔有精加試
練所冀去留無濫優劣昭然昨據貢院奏今年新及第
進士等所試文字或有否臧爰命詞臣再令考覆庶涇
渭之不雜免玉石之相參其劉垣單貽慶李頌徐緯張
覲等詩賦稍優宜放及第王汾據其文辭亦未精當念
以頃曾駁落特與成名熊若谷陳保衡皆是遠人深可
嗟念亦放及第郭峻趙保雍楊丹安元度張昉董咸則
杜思道等未甚苦辛並從退黜更宜修進以俟將來知

貢舉右諫議大夫劉濤選士不當有失用心責授右贊
善大夫俛令省過以戒當官先是濤於東京放榜後引
新及第進士劉垣已下一十五人赴行在帝命翰林學

士李昉覆試故有是命

舊五代史
周世宗紀

戶部侍郎權知貢舉趙上交奏諸科舉人欲等第各加
封義場數進士除詩賦外別試雜文一場從之

舊五代
史周太

祖
紀

以戶部侍郎知貢舉趙上交爲太子詹事是歲新進士
中有李觀者不當策名物議誼然中書門下以觀所試

詩賦失韻勾落姓名故上交移官

舊五代史
周太祖紀

尚書禮部貢院進新及第進士李覃等一十六人所試
詩賦文論策文等詔曰國家設貢舉之司求英俊之士
務詢文行方中科名比聞近年已來多有濫進或以年
勞而得第或因媒勢以出身今歲所放舉人試令看驗
果見紕繆須至去留其李覃何曦楊徽之趙鄰幾等四
人宜放及第其嚴說武允成王汾閻邱舜卿任惟吉周
度張慎徽王翥馬文劉選程浩然李震等一十二人藝
學未精並宜勾落且令苦學以俟再來禮部侍郎劉溫

叟失於選士頗屬因循據其過尤合行譴謫尙視寬恕
特與矜容劉溫叟放罪其將來貢舉公事仍令所司別

具條理以聞

舊五代史
周世宗紀

其進士請令後省卷限納五卷已上於中須有詩賦論
各一卷餘外雜文詞篇並許同納祇不得有神道碑誌
文之類其不及第人以文藝優劣定爲五等取文字乖
舛詞理紕繆最甚者爲第五等殿五舉其次者爲第四
等殿三舉以次稍優者爲第三第二第一等諸科舉人
所對策問或不應問目詞理乖錯者並當駁落其諸科

舉人請第一場十否者殿五舉第二場三場十否者殿
三舉其三場內有九否者並殿一舉其進士及諸科所
殿舉數並於所試卷子上朱書封送中書門下請行指
揮及罪發解試官監官等其監官試官如受取解人情
禮財物請今後並准枉法贓論又進士以德行為基文
章爲業苟容欺詐何稱科名近年場中多有詐僞託他
人之述作竊自己之聲光用此面欺將爲身計宜加條
約以誠輕浮今後如有倩人述作文字應舉者許人告
言送本處色役永不得仕進

竇儀貢舉
事例奏

冊府元龜

命戶部員外郎伍喬於圍城中放進士孫確等三十八

人

一作張確

其所施爲多此類

鈞磯立談曰後主天性喜學問常命諸臣分夕于光政殿

與相劇談至夜分乃罷其論國事每以富民爲務好生戒殺本其天性羣臣議論率不如旨一日歎曰周公仲尼忽去人遠吾道蕪塞其誰與明乃著爲雜說數千萬言曰特垂此空文庶幾百世之下有以知吾心耳

十國春秋

南唐紀

國家武德初令天下冬季集貢士於京師天子制策考其功業辭藝謂之進士已廢於行實矣其後以郎官權輕移之於禮部大率以三場爲試初以詞賦謂之雜文復對所通經義終以時務爲策目雖行此擢第又不由

於文藝矣唯王公子弟器貌奇偉無才無藝者亦冠於
多士之首然相士之道備嘗聞之有門閥清貴者有狀
骨卿相者有容質秀麗者有才藻可尚者有權勢抑取
者有朋友力盛者朝廷取士之門於斯爲最衰世以來
多非其人明廷無策問之科有司無至公之道登第之
人其辭賦皆取能者之作以玉易石羊質虎皮闕抱犢
之人汨沒塵土天九重高不可以叫加以浮薄之子遞
相唱和名第之中以隻數爲上賤其雙數以甲乙爲貴
輕彼兩科題目之間增其異名

牛希濟
貢士論

文苑英華

滔復曉夕以思江山之事林君則以合浦垂名夫子則

以申秦得意高步斯振宏規靡異前輩曠世後來遂志

俱蟠使下之栢俱擅乙中之二

林端公貞元七年首闈越之科第以珠還合浦

賦擅名後十年蒲邑許員外榮登自此文學之士繼踵而悉不偶時曠八十七年始鍾於延封其文以申秦續

篇擅名後六七年徐正字及第兼滔塵忝林端公同延封榜皆第十二人皆開路於後人皆終使府大判官判

官皆栢臺林荆南延封聞中也推是言之豈偶然耳賢哲相望今昔一

致祭陳侍黃御史集
御嶠文

滔始者匠故交之爲詩希咸通季初貢於小宗伯試禹

拜昌言賦翼日罷特持斯賦於先達之門忽叨見錢之

目原注俗云以詩爲未錢而市物以賦爲持錢而市物 答陳磻隱 黃御史集 論詩書

洎聖一作唐高祖以神武而靜天下用文教而鎮萬姓

武德五年帝詔有司特以進士爲選士之目仍古道也

自鄉升縣縣升州升府皆歷試行藝秋會貢於文昌

咸達一作帝庭以光王國然後會羣后謁先師備牲牢

奏金石尊儒教也若明試其業主張其文一作能否

於聽覽之間定取捨於筆削之下職在考功郎後至元

宗開元二十五年重難其事更命春官小宗伯主之而

業文志學之士勸矣於是獻藝輸能擅場中的者勝第

揭出萬人觀之未浹旬而名達四方矣

李奕登科記

自志烈秋霜而下凡五十九科自顯慶三年至大和二
年及第者二百七十人有一人中數科者員半千陸元
方崔融陽嶠舉八科皆中 張鷟應下筆成章等七科
皆中 裴守真六科連中 李懷遠擢四科 孫逖中
四科 開元十年 舉賢良方正元宗第其文異等 席豫

中三科

學兼流畧詞擅文場手筆俊拔

崔圓韓思彥琬

中二科

圓開元中詔舉遺逸以鈐謀對策甲科

柳公綽

舉賢良方正直言極諫間一歲再登其科 張柬之永

昌元年賢良第一

時對策者千餘

歸崇敬天寶中舉博

通墳典科對策第一詔舉才可宰百里者復策高第

房

瑄舉任縣令科

韋處厚擢才識兼茂科賢良方正異等

裴度以宏辭補校書郎舉賢良方正 鄭亞舉進士

賢良拔萃三中其科

楊仲昌元稹對策第一

白居易

制策一等

呂元膺賢良高第

韓皋異等

韋夏卿

大厯中高等

牛僧孺以賢良對策與李宗閔皇甫湜俱

第一

楊於陵程其文

玉海

志

兼列傳會要

高祖詔諸州明經秀才俊士進士縣考試州

長重覆歲隨方入貢崔沔舉賢良方正高第不中者痛
訾之武后勅有司覆試對益工遂爲第一開元中詔禮
部考試畢所試雜文及策送中書門下詳覆其後中廢
建中三年四月詔及第者送名中書門下重加考覈玉海
志開元二十九年置崇元學習老莊文列亦曰道舉天
寶十二載道舉停老子加周易寶應二年六月二十六
日停道舉玉海

鴻輝

謹案唐書載康子元開元初詔張說舉治易老

莊者侯行果薦子元於說說以聞得侍讀元載天寶

初舉明莊老列文四子學者載策入高第獨孤及天
寶末道舉高第

志載初元年策問貢士于洛城殿殿試人自此始

高宗
永隆

元年試 玉海
武成殿

志有司以僻書隱學爲判目初試選人皆糊名令學士
考判武后以非委任之方罷之開元十五年九月復糊

名試判考等第奏聞

糊名校判侍部蘇晉
獨事賞拔當時譽之

玉海

儒學傳序自楊綰鄭餘慶鄭覃等以大儒輔政議優學
科先經義黜進士後文辭亦未能克也

玉海

吳氏能改齋謾錄曰杜陽編記舒元興進士既試脂炬人皆自將以余考之唐制如此耳而舊說亦言舉人試日已晚主文權德輿於簾下戲云三條燭盡燒殘舉子之心舉子遽答云八韻賦成驚破侍郎之膽故國史竇正固傳舊制夜試以二燭爲限晉長興二年改令晝試正固以短晝奏復夜試周廣順中竇儀奏復用晝乃知本朝循周不許見燭

文獻通考

唐人嘗有題詩試闈者曰三條燭盡鐘初動九轉丹成鼎未開殘月漸低人擾擾不知誰是謫仙才讀此知其

爲夜試矣而未知自夜以始耶抑通晝夜也白樂天集
長慶元年重考試進士事宜狀伏準禮部試進士例許
用書策兼得通宵得通宵則思慮精用書策文字不錯
然重試之日書策不容一字木燭只許兩條迫促驚忙
幸皆成就與禮部所試不同縱有瑕病或可矜量其曰
通宵則知自晝達夜前詩言盡三燭而此止得兩燭皆
可畧存唐制也

考古
編

往時科場例寬試官有在簾下看舉子作文者故傳三
條燭盡燒殘舉子之心八韻賦成驚破試官之膽之語

但場中不許見燭豈有試官自謂三條燭盡之理此蓋
五代夜試時事也五代時竇貞固謂晝短舉子文字難
了因請夜試許用三條燭故韋貽永詩云三條燭盡鐘
初動九轉丹成鼎未開此亦夜試之詩於此可見矣

閒評

鼂錯對策首云平陽侯臣宙等所舉賢良方正太子家
令臣錯自言所舉之人及其官爵無所隱漢制猶古也
自後史無所紀唯唐張九齡對策首云嗣魯王道堅所
舉道侔伊呂科行祕書省校書郎張九齡自糊名易書

之法密不復見此矣道堅魯王靈夔之孫本傳稱其方嚴有禮法是以能舉九齡而秉史筆者不書於傳僅見

九齡集

國學紀聞

禮部侍郎楊綰上疏以爲古之選士必取行實近世專尚文辭自隋煬帝始置進士科猶策試而已至高宗時考功員外郎劉思之始奏進士加雜文明經加帖括從此積弊轉而成俗朝之公卿以此待士家之長老以此訓子其明經則誦帖括以求僥倖又舉人皆令投牒自應如此欲其返淳樸崇廉遜何可得也請令縣令察孝

廉取行著鄉閭學通經術薦之於州刺史考試升之於
省任各占一經朝廷擇儒學之士問經義二十條對策
三道上策卽注官中第得出身下第罷歸又道舉亦非
理國所資與明經進士並停上命諸司通議給事中李
栖筠右丞賈至京兆尹嚴武並與綰同至議以爲令試
學者以帖經爲精通考文者以聲病爲是非風流頽弊
誠當釐改然自東晉以來人多僑寓土居鄉土者百無
一二請兼廣學校保桑梓者鄉里舉焉在流寓者庠序
推焉敕禮部具條目以聞

涉史
隨筆

柳子厚送章秀才序曰今進士歲數百人咸多爲文詞道古今角誇麗務富厚有司一朝而受者不知幾千萬言讀不能十一卽偃仰疲耗目眩而不欲視心廢而不欲營余嘗見貢院謄錄人說每日各拋下卷子若干限以時刻遲則刑責隨之日夜不得休息饑困交攻眼目赤澁見試卷有文省字大塗注少則心開目明自覺筆健樂爲好寫又嘗見時文冊子遇大學公私試一題輒印三二十篇讀至五十篇加至十數便已困倦爲考官者可知矣故凡程文以簡潔爲主大字楷書次之

吹劍錄外

集

國初韻畧載進士所習有何論一首施肩吾及第勅亦列其所習何論一首蓋如三傑佐漢孰優四科取士何

先之類

老學菴筆記

漢舉賢良自董仲舒以來皆對策三道文帝二年對策者百人晁錯爲高第武帝元光五年對策者亦百人公孫宏爲第一當時未有黜落法對策者皆被選但有高下爾至唐始對策一道而有中否然取人比今多蓋自後周加試策論三道於禮部每道以三千字爲率故得

人頗艱

石林燕語

唐以詩賦取士科試日給燭三條作賦八韻時謠云三條燭盡燒殘舉子之心八韻賦成驚破試官之膽又云三條燭盡鐘初起九轉丹成鼎未開然八韻律賦似不待三條燭盡而後成是知唐士才思遲鈍若溫飛卿八

又能有幾耶

徐氏筆精

禮部采名故預投公卷柳宗元上權德輿溫卷後周寶儀請進士省卷納五軸以上崔郾試士吳武陵以杜牧之阿房賦予之請以第一人處牧之錢徽不聽段文昌

李紳託而貶

通雅

唐以來初擢第者通稱前進士韓文公墓碑云孤前進士昶蓋文公長慶四年卒昶方於是年李宗閔下擢進士第後唐李龍少以文章知名既貴刻牙板金字曰前鄉貢進士雖表其榮名亦唐制之餘也

愛日齋叢抄

唐設諸科取士其名隨時起立最爲龐雜今悉錄之志烈秋霜科幽素科詞殫文律科岳牧科詞標文苑科蓄藻麗之思科抱儒素之業科臨難不顧狗節甯邦科長材廣度沉跡下僚科文藝優長科絕倫科拔萃科疾惡

科龔黃科才膺管樂科才高位下科材堪經邦科賢良
方正科抱器懷能科茂才異等科文以經國科藏名負
俗科文經邦國科藻思清華科興風興化科道侔伊呂
科手筆俊拔超越輩流科直言極諫科哲人奇士逸淪
屠釣科良材異等科文史兼優科文儒異等科博學通
議科文詞雅麗科將帥科武足安邊科高才沉淪草澤
自舉科才高未達沉迹下僚科博學宏詞科多才科王
霸科知謀將帥科文詞秀逸科風雅古調科詞藻宏麗
科樂道安貧科諷諫主文科文詞清麗科經學優深科

高蹈邱園科軍謀越衆科孝悌力田聞於鄉閭科博通
墳典達於教化科識洞韜畧堪任將帥科清廉守節政
術可稱堪任縣令科詳明政術可以理人科才識兼通
明於體用科達於吏理可使從政科軍謀宏達才任將
帥科詳明吏理達於教化科凡此皆率意命名非有別
異亦恐先有欲舉之人而創名以網之耳

六視齋
二筆

唐初吏部試選人皆糊名令學士考判武后以爲非委
任之方罷之貞元中陸贄知貢舉訪士之有才行者於
翰林學士梁肅肅曰崔羣雖少年他日必至公輔果如

其言太和初禮部侍郎崔郾試進士東都吳武陵出杜牧所賦阿房宮辭請以第一人處之此知其賢而進之也張昌齡舉進士與王公治齊名皆爲考功員外郎王師旦所絀太宗問其故對曰昌齡等華而少實其文浮靡非合器也取之則後生勸慕亂陛下風雅帝然之

錄

日知

今人但以貢生爲明經非也唐制有六科一日秀才二

日明經三日進士四日明法五日書六日算

大唐新語隋楊帝置

明經進士二科國家因隋制增置當時以詩賦取者謂秀才明法明字明算並前爲六科

之進士

金史移刺履傳進士之科隋大業中始試以策
唐初因之高宗時雜以箴銘賦詩至文宗始專

賦以經義取者謂之明經

葉石林避暑錄話唐制取士
用進士明經二科本朝初唯

用進士其罷明經不知自何時仁宗患進士
詩賦浮淺不本經術嘉祐三年始復明經科

今罷詩賦

而用經義則今之進士乃唐之明經也

日知錄

唐制取士之科有秀才有明經有進士有俊士有明法

有明字有明算有一史有三史有開元禮有道舉有童

子而明經之別有五經有三經有二經有學究一經有

三禮有三傳有史科此歲舉之常選也其天子自詔曰

制舉如姚崇下筆成章張九齡道侔伊呂之類見於史

者凡五十餘科

困學紀聞唐制舉之名多至八十有六

故謂之科目

日知錄

試判起於唐高宗時初吏部選才將親其人覆其吏事始取州縣案牘疑議試其斷割而觀其能否後日月浸久選人猥多案牘淺近不足爲難乃采經籍古義假設甲乙令其判斷既而來者益眾而通經正籍又不足以爲問乃徵僻書曲學隱伏之義問之惟懼人之能知也佳者登於科第謂之入等其甚拙者謂之藍縷各有升降選人有格限未至而能試文三篇謂之宏詞試判三條謂之拔萃亦曰超絕詞美者得不拘限而授職

日知錄

文苑英華判目有云鄉舉進士至省求試秀才考功不聽求訴不已趙昂判曰文藝小善進士之能訪對不休秀才之目文選任昉爲蕭揚州作薦士表訪對不休質疑斯在是又進士求試秀才而不可得也今以生員而冒呼此名何也日知錄

全唐文紀事卷十五終